



24. maj 2022

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuningga apeqquteqaateqarpunga:

**Naalakkersuisunut apeqquteqaatit:**

1. Sunik tigussaasunik Islandip Kalaallit Nunaata akornanni isumaqatigiissuteqartoqarpa islandip statsministeriata Nuummut tikeraarneranut atasumik?
2. Niueqatigiinnermut isumaqatigiissusiortoqarsimarpasippoq. Isumaqatigiissut taanna tigussaasumik qanoq kinguneqassava?
  - a. Isumaqatigiissut sutigut Kalaallit Nunaannut iluaqutaassava?
  - b. Isumaqatigiissut sutigut Kalaallit Nunaannut ajoqutissartaqassava?
  - c. Isumaqatigiissutip kalaallit nunaanni suliffeqarfinnut aningaasatigut kingunissai suuppat?
    - i. Isumaqatigiissuteqarsimanerup kalaallit nunaanni suliffeqarfinnut pitsaaqutaasinnaasunik ajoqutaasinnaasunillu assersuutinik Naalakkersuisut saqqummiusseqquneqarput
3. Kalaallit Nunaata Islandillu akornanni tunisat pisiallu oqimaaqatigiinnerat ullumikkut qanorippa (eqqussuineq avammullu tunisineq)?
  - a. Kisitsisit taakku malillugit niueqatigiinnissamut isumaqatigiissuteqarsimaneq kia annerpaamik iluaqutigissavaa?
4. Kalaallit Nunaata ullumikkut akitsuutitut assigiinngitsunut aningaasat qassit isertittarpai Islandip Kalaallit Nunaatalu niueqatigiinneranni?
  - a. Ullumimut sanilliullugu niueqatigiinnissamut isumaqatigiissuteqarnermi Kalaallit Nunaata qassit isertissavai (missigerlugu)?
5. isumaqatigiissutigineqarsimasunut atatillugu allanik Naalakkersuisut paasissutissiisnaappat?

(Inatsisartunut ilaasortaq Jens-Frederik Nielsen, Demokraatit)

**Tunngavilersuut**

Islandip statsministeria Nuummut tikeraarsimavoq, tassanilu Naalakkersuisut siulittaasualu arlaqartunik oqaluuserisaqarsimallutik.



KNR-imi atuarneqarsinnaavoq Kalaallit Nunaat Islandilu sulit suleqatigiinnerussasut, ilaatigullu akileraaruserneqanngitsunik niueqatigiinnissaq isumaqatigiissutigineqarsimalluni<sup>1</sup>. Sermitsiaq.AG-mi atuarneqarsinnaavoq, nunat taakku marluk killilersugaanngitsumik niueqatigiinnissamik kissaateqartut<sup>2</sup>.

Tamarmilli tigussaarpasigatillu timitaqarpassinngillat.

Kissaatiginaraluaqaaq, Naalakkersuisut nammineerluinnarlutik ammasumik ersarissumillu isumaqatigiissuteqarsimagaluarpata. Ajoraluartumilli aasit Naalakkersuisut matoqqanissartik oqaluppianninnissartillu toqqarsimavaat.

Tamanna tunngavigalugu allatut ajornartumik uku apeqquteqaatigisariaqarpakka, tamatta paasisaqarniassagatta.

Apeqquteqaatima ullut suliffiusut qulit iluanni akineqarnissaat qilanaaraara.

---

<sup>1</sup> [Island Kalaallit Nunaallu suleqatigiinnerulerusupput | KNR](#)

<sup>2</sup> [Suleqatigiilernerme killilersugaanngitsumik niueqatigiinneq qulakkeerneqassaag | Sermitsiaq.AG](#)